

SAMÞYKKT

um hundahald í Tálknafjarðarhreppi.

1. gr.

Hundahald er bannað í Tálknafjarðarhreppi að undanteknum þarfahundum á lögbýlum og hundum sem notaðir eru til leitar og björgunarstarfa, svo og aðstoðarhundum blindra og fatlaðra.

2. gr.

Sveitarstjórn er þó heimilt að veita lögráða einstaklingum sem lögheimili eiga í sveitarfélaginu undanþágu til hundahalds með eftirfarandi skilyrðum:

1. Hundurinn skal skráður á skrifstofu Tálknafjarðarhrepps og þar fær eigandi hundsins afhenta númeraða plötu sem jafnan skal vera í ól um háls hundsins.
2. Árlega skal sveitarsjóði greitt leyfisgjald fyrir þá hunda, sem undanþága er veitt fyrir samkvæmt gjaldskrá sem sett er samkvæmt ákvæðum 25. gr. laga nr. 7/1998 um hollustuhætti og mengunarvarnir og að fenginni umsögn heilbrigðisnefndar. Gjöld mega aldrei vera hærrí en sem nemur rökstuddum kostnaði við veitta þjónustu eða framkvæmd. Gjaldskráin skal birt í B-deild Stjórnartíðinda. Við ákvörðun gjaldsins skal tekið mið af þeim kostnaði, sem leiðir af framkvæmd þessarar samþykktar. Gjaldið skal í fyrsta sinn greitt við skráningu hunds og síðan árlega fyrirfram 1. mars ár hvert. Í gjaldskrá skal einnig ákvæðið handsömunargjald. Hundar sem notaðir eru við búrekstur á lögbýlum eru undanþegnir þessu gjaldi, svo og hundar sem notaðir eru til leitar og björgunarstarfa og hundar sem að læknisráði eru notaðir til aðstoðar blindu fólki og fötluðu. Hafi gjaldið ekki verið greitt innan eins mánaðar frá gjalddaga er heimilt að afturkalla leyfið, svo og ef hreinsun hunda er ekki framkvæmd eftir settum reglum.
3. Tálknafjarðarhreppur ábyrgðartryggir alla skráða hunda, sem greitt er leyfisgjald af. Þeir hundaeigendur sem undanþegnir eru leyfisgjaldi, ábyrgðatryggja hunda sína hjá viðurkenndu tryggingarfélagi, þeir skulu og greiða sveitarsjóði útlagðan kostnað vegna hundahreinsunar. Við hundahreinsun skulu hundaeigendur sem eru undanþegnir leyfisgjaldi leggja fram kvittun frá tryggingarfélaginu, sem sýnir að trygging sé í fullu gildi.
4. Hundurinn skal aldrei ganga laus á almannafæri, heldur vera í taumi í fylgd með aðila, sem hefur fullt vald yfir honum. Hundaeigandi skal gæta þess að hundur hans valdi ekki hættu eða raski ró manna eða verði mönnum til óþæginda á neinn annan hátt. Skilyrði fyrir hundahaldi í sambýlishúsum, er að allir íbúðareigendur samþykki og skal leggja fram skriflegt samþykki þar um við skráningu hundsins. Þá er umráðamönnum alltaf skylt að fjarlægja saur eftir hundinn. Eigi er leyfilegt að hafa með sér hunda þó í taumi séu inn í opinberar stofnanir, skólahús, matvöruverslanir eða aðra þá staði sem um ræðir í fylgiskjali 3 með reglugerð nr. 941/2002 um hollustuhætti.
5. Hundaeiganda ber að hlíta að öðru leyti lögum og reglum, er hundahald varðar, þ. á m. reglum um árlega hreinsun hunda og greiðslu leyfisgjalds, sbr. 2. tl. hér að framan, svo og fyrirmælum sem heilbrigðisnefnd setur.
6. Bændum á lögbýlum er heimilt að hafa þarfahunda án gjalds. Hundar á lögbýlum mega ganga frjálssir á landareign eigenda sinna. Að öðru leyti skulu slíkir hundar háðir ákvæðum þessarar samþykktar. Skylt er bændum á lögbýlum og eigendum hunda sem nefndir eru í 2. tl. hér að framan að sjá til þess að hundar þeirra séu ekki lausir á almannafæri.

3. gr.

Tálknafjarðarhreppur fer með umsýslu vegna samþykktar þessarar og annast starfsmaður áhaldahúss framkvæmd og eftirlit með hundahaldi í Tálknafjarðarhreppi og starfar hann í umboði heilbrigðisnefndar. Eftirlitsmaður getur leitað aðstoðar lögreglu við framkvæmd starfa sinna, ef hundur er að mati eftirlitsmanns hættulegur umhverfi sínu og/eða eigandi eða vörsluaðili hundsins tálmar starfi eftirlitsmanns samkvæmt samþykkt þessari og almannahagsmunir og/eða heilbrigðissjónarmið valda því að nauðsynlegt er að leita atbeina lögreglu við að fjarlægja hund.

4. gr.

Hunda úr aðliggjandi sveitum, sem ekki eru í fylgd með eigendum eða umráðamanni og eru ómerktir, svo og aðra ómerkta flækingshunda, skal taka úr umferð. Gefi eigandi sig ekki fram innan sjö sólarhringa hefur lögregla eða dýralæknir heimild, að beiðni eftirlitsmanns, til þess að lóga viðkomandi hundi þegar í stað.

Merktir hundar á flækingi skulu einnig teknir úr umferð. Ef eigandi vitjar hans eigi innan sjö sólarhringa og svarar ekki til saka um brot á samþykkt þessari, sé um slíkt að ræða, hefur lögregla eða dýralæknir heimild til að lóga hundinum án frekari fyrirvara.

Hunda sem ráðast á menn eða skepnur, skal fjarlægja og lóga þegar í stað.

Hreppsnefnd er heimilt hvenær sem er að afturkalla undanþágu fyrir einstökum hundum eða allar undanþágur, telji hún þess þörf.

5. gr.

Framangreind samþykkt Tálknafjarðarhrepps staðfestist hér með samkvæmt 25. gr. laga nr. 7/1998 um hollustuhætti og mengunarvarnir, með síðari breytingum til þess að öðlast gildi þegar við birtingu.

Umhverfisráðuneytinu, 18. júlí 2007.

F. h. r.

Ingimar Sigurðsson.

Sigurbjörg Sæmundsdóttir.